



UNIVERSITÄTS-
BIBLIOTHEK
PADERBORN

Clypevs Theologiæ Thomisticæ

Continens Tractatus de attributis, de visione Beatifica, de scientia Dei, ac
de ejus voluntate, & Providentia

Gonet, Jean-Baptiste

Parisiis, 1669

§. IV. Præcipuæ objectiones solvuntur,

[urn:nbn:de:hbz:466:1-77232](#)

DE NATVRA THEOLOGIÆ.

7

logia, quam h̄c in via acquirimus, & quam diximus remanere in patria; & ista est formaliter discursiva, ex principio enim lumine gloriae cognitis, & in Deo manifestatis, per discursum, & lumen naturale intellectus, deducit conclusiones quas per proprias species cognoscit extra verbum; & sic lumen gloriae non concurrit immediate ad assensum illarum, sed mediante lumine naturali intellectus discurrentis, & ratiocinantis circa principia clarè cognita, & in verbo manifestata: vnde talis scientia non est perfectè nec entitatiè supernaturalis, sed imperfectè tantùm, & radicaliter, seu præsuppositiū, ut infra ostendimus de Theologia existente in nobis viatoribus, qua deducit suas conclusiones ex principiois obscurè reuelatis. Tertia

B

tandem scientia est purè naturalis, quam Beati habent de rebus naturalibus, per principia lumine naturali nota; & h̄c est multiplex specie, iuxta diuersitatem specificam objectorum circa quæ versatur, & remansit in Dēmonibus; quia in illis, vt docet Dionysius, omnia naturalia integrā remansere.

Inferes secundò: illos qui h̄c in via fuerunt Theologi (ceteris paribus) plura cognoscere in patria extra verbum, per proprias species, h̄c in via proprio labore & studio comparatas, quam alios qui non fuerunt Theologi. Quia (vt ostendimus) habitus Theologie in via acquisitus, remanet in patria, & se extendit ad ea omnia clarè videnda, quæ in via obscurè cognoscebat.

Inferes tertio: Theogiam quam h̄c in via acquirimus, non remanere in patria, solum ad ornatum, sed etiam ad exercitum. Ut enim exposuimus in quarto notabili, illi habitus remanent in patria, non solum ad ornatum, sed etiam ad exercitum, quorum exercitium non est incompensabile cum statu beatitudinis: at discurrere, & per lumen naturale intellectus, ex articulis fidei clarè vīsīs, & in verbo manifestatis, conclusiones inferre, non repugnat statui beatitudinis: sicut cognitio vespertina, quam Angeli habent de rebus, secundum quod habent esse in propria natura, non repugnat cognitioni matutinae, per quam illas cognoscunt secundum quod habent esse in verbo: ergo habitus Theologie remanet in patria, non solum ad ornatum, sed etiam ad exercitum.

§. IV.

Principia objectiones soluntur.

17. Objicies primo contra primam conclusiōnem: Scientia subalternans, teste Aristotele 1. Post. debet dicere propter quid de principiois subalternantibus, id est debet illa demonstratiū probare; vnde communiter dicitur, *Vbi definit Physicus, ibi incipit Medicus*: id est conclusiones scientie subalternantis, qualis est Physica, debent esse principia subalternata, qualis est Medicina: sed scientia Dei & Beatorum, non dicit propter quid de principiois Theologie; quia illa sunt articuli fidei, qui sunt indemonstrabiles, nec possunt probari per causam: ergo &c.

Confirmatur: Scientia subalternans non debet attingere veritates, & conclusiones, quæ in subalternata demonstrantur, alioquin illæ scientie non distinguerentur: sed scientia Dei, cùm sit infinita, attingit veritates, & conclusiones que demonstrantur in nostra Theologia: ergo &c.

Ad objectionem respondeo majorem esse veram in scientiis discursivis, quales sunt scientie

A subalternantes ordinis naturalis, secūs autem quando subalternans non est discursiva, vt contingit in proposito. Vnde ad saluandam subalternationem Theologie, ad scientiam Dei & Beatorum, sufficit quod in illis articuli nostræ fidei notificantur & clarè cognoscantur, non autem requiritur quod demonstrentur. Addo quod, in scientia Dei & Beatorum, demonstrantur plures articuli nostra fidei (vt quod Deus sit trinus in personis, omnipotens, aternus &c.) per naturam diuinam, tanquam per causam virtualem, se rationem à priori Diuinorum Attributorum: licet enim scientia Dei & Beatorum, non sit formaliter discursiva, virtualiter tamen discurrat, quatenus vñico & simplicissimo intuitu, videt effectus in causis, & conclusiones in principiois.

Ad confirmationem dicendum est primi: maiorem esse veram, quando scientia subalternans est finita & limitata, quales sunt scientie subalternantes ordinis naturalis: secūs vero, si sit infinita, & comprehensiva, qualis est scientia Dei: tunc enim debet ad omnia se extendere, nec solam attingere principia, sed etiam conclusiones scientie subalternatae.

Secundò dici potest, maiorem esse quidem veram in scientiis naturalibus, propter idem lumen naturale, & eundem modum procedendi, quæ in illis reperitur; non tamen in supernaturalibus, ratione opposita; sufficit enim ad diuersitatem, & subalternationem scientiarum, quod procedant sub diuersa ratione formalis, sive sub diuerso lumine, quorum unum dependeat & subordinetur alteri, vt contingit in nostra Theologia, respectu scientie beatæ.

Objicies secundò: omnis scientia subalternata habet objectum contrariū, quam subalternans, vt constat in Musica, & Perspectiva, quæ limitant & contrahunt objectum Arithmetice & Geometrie, per aliquam differentiam accidentalem, quam illi superaddunt: sed Theologia habet idem omnino objectum, ac scientia Dei, & Beatorum, scilicet Deum sub ratione Deitatis, vt constabit ex dicendis articulo sequenti: ergo ipsi non subalternatur.

Respondeo primò, maiorem esse veram, D quando scientia subalternans versatur circa objectum finitum & limitatum: tunc enim subalternata debet illud contrahere, per aliquam differentiam accidentalem, ratione cuius habeat nouam scibilitatem, & sit radix nouarum proprietatum, quæ in illa demonstrantur: secūs autem quando subalternans versatur circa objectum infinitum, & illimitatum; illud enim, ratione sue infinitatis, sine additione alicuius differentiae accidentalis, plures habere potest modos cognoscibilitatis, & scibilitatis, ratione quorum, prout substar diuersis luminibus, diuersas potest terminare scientias, vt antea exposuimus.

Respondeo secundò, quod licet Deus sit in se simplicissimus, vt tamen subest lumini glorie, sub qua ratione est objectum scientie Beatorum, magis latè patet, & plura in eo cognoscuntur, quam vt subest lumini fidei, & obscurè reuelationis, sub qua ratione est objectum nostre Theologie: quare illa habet objectum contrariū, & minus latè patens, quam scientia Beatorum cui subalternatur.

Objicies tertio: non est propriè subalternatio inter scientiam & habitum primorum principiorum, vt docent Philosophi, quando agunt de

18.

19.

DISPUTATIO PROOEMIALIS

subalternatione scientiarum: sed scientia beata est habitus primorum principiorum respectu Theologiae, cum per lumen gloriae, & visionem beatam, articuli fidei, qui sunt principia nostrae Theologiae, manifestentur, & reuelentur: ergo inter Theologiam, & scientiam beatam, non est vera & propria subalternatio.

Respondeo scientiam beatam habere simul rationem scientiae subalternantis, & habitus primorum principiorum, respectu nostrae Theologiae: quatenus enim uno & simplici intuitu, fertur in essentiam diuinam, & in omnia quæ in ea sunt formaliter, habet rationem habitus principiorum; inquantum verò sic videt essentiam diuinam, ejusque attributa, ut cognoscatur vnam esse causam virtualem, & rationem à priori alterius, habet rationem scientie; & ipsi hoc modo sumpta dicimus Theologiam nostram propriè subalternari.

Objicies ultimò contra secundam conclusio-
nenem: Apostolus i. ad Corinth. 13, docet quod
in Cœlo lingue cessabunt, & scientia destruc-
tur: Ergo Theologia non remanebit, sed de-
structetur in patria.

Confirmatur: adueniente perfecto, evacua-
tur imperfectum, ut ibidem dicit Apostolus:
sed Theologia nostra, cum sit obscura, & ine-
videns, est cognitio imperfecta: ergo destruetur,
adueniente visione beatifica, quæ est perfecta
cognitio.

Respondeo quod sicut quando Scriptura di-
cit, quod elementa post diem Judicij dissolu-
turi: hoc non intelligitur de destructione quantu-
m ad substantiam, sed solùm quantum ad
statum, vel modum; quatenus scilicet muta-
buntur in statum perfectiorem: ita similiter
quando Apostolus dicit, quod scientia destrue-
tur, hoc non debet intelligi de destructione
quantum ad substantiam, sed solùm quantum
ad modum obscuritatis, vel inuidentie, quem
nunc habet, vel quantum ad modum operan-
di imperfectum, scilicet per conversionem ad
phantasmata, & per species à sensibus acceptas;
vt que enim hic modus cognoscendi in patria
destruetur, quia tunc (vt docet D. Thomas, su-
per hunc locum Apostoli) non erit ex necessitate,
sed ex electione, conuersus ad phantasmata.
Et hunc esse sensum Apostoli patet satis ex
contextu litterarum, subdit enim: *Cum autem venerit
quod perfectum est, evanescabit quod ex parte
est.* Quod statim probat exemplo parvitorum,
quorum imperfecta sapientia, & loquela destrui-
tur cum atate: non enim destruitur eorum sapientia
& loquela simpliciter, sed quantum ad
imperfectionem; quia adulti melius sapient, &
loquuntur.

Ad confirmationem dicendum cum eodem S.
Doctore i. parte quæst. 8. art. 7. ad 3. *Quod
veniente perfecto evanescatur imperfectum, quod ei
opponitur: sicut fides quæ est eorum quæ non vi-
dentur, evanescatur, visione veniente.* Non au-
tem necesse est, quod adueniente perfecto, eva-
cuerit imperfectum, quod ei non opponitur.
Sicut quia imperfectio cognitionis vespertinae,
non opponitur perfectioni cognitionis matutinae,
per illam non evanescatur, vt ibidem docet Sanctus
Thomas. Unde cùm Theologia nostra non op-
ponatur visioni beata, quia non importat ine-
videntiam positivam, sicut fides, sed negativam
tantum (vt ante exposuimus) non evanescatur
adueniente visione, sicut fides, sed potius perfici-

A tur, & consummatur, sicut caritas; vel sicut
dónum scientie, & sapientie, aliæque virtutes,
& dona, quæ non repugnant statui beatitudinis.

ARTICVLVS III.

*Quodnam sit subiectum vel objectum
nostræ Theologie?*

§. I.

Quibusdam præmissis difficultas resolutur.

N Otandum primò ex Capreolo quæst. 4.
prologi art. 1. concl. 2. quod in quali-
bet scientia, aliquo modo differunt subiectum,
& objectum; objectum enim scientie est conclu-
sio in illa demonstrata: subiectum verò est illud
quod subiectum in conclusionibus, & de quo
prædicta aliqua, seu passiones demonstrantur.
Veruntamen secundum communem Theologo-
rum usum, subiectum & objectum, pro eodem
communiter accipiuntur, & idcirco in titulo
querimus, quodnam sit subiectum, vel ob-
jectum Theologie?

Notandum secundò, objectum esse duplex,
aliud materiale, aliud formale. Objectum mate-
riale, dicitur illud quod non per se & ratione sui
attingitur à scientia, sed ratione objecti forma-
lis. Formale autem est illud quod per se & ratio-
ne sui consideratur: v. g. in potentia visuā, cor-
pus est objectum materiale, quia non percipitur
ratione sui, sed ratione coloris quo afficitur: ip-
se verò color, quia percipitur ratione sui, dici-
tur objectum formale.

Notandum tertio cum Cajetano, hic art. 3.,
objecti formalis duas esse rationes formales dis-
tinguendas: aliam quæ dicitur ratio formalis
qua: aliam quæ vocatur ratio formalis *sub qua*.
Ratio *qua* est res ipsa quæ à potentia, vel scientia
percipitur: ratio *sub qua* illa dicitur, quæ me-
diante ratio *qua* in esse rei consideratur: v. g. in
eadem potentia visuā, ratio *qua*, est color: ra-
tio verò *sub qua*, est lux, quia mediante luce
visus percipit colorem.

Notandum quartò, aliquid posse dici reuelatum
dupliciter. Primo, formaliter & immediatè, sicut reuelatum est, Deum esse trinum, Christum
esse hominem. Secundo, virtualiter & medi-
atè, quando scilicet in re immediatè reuelata,
alia virtualiter continetur, vel tanquam effec-
tus in causa, vel proprietas in essentia, quæ per
discursum deducitur: quo pacto in ista proposi-
tione, *Christus est homo*, hec, *Christus est trisibi-
lis*, virtualiter, & mediatè censetur reuelata.
His presuppositis.

Dico, objectum formale & specificatum
Theologie, esse Deum, sub ratione Deitatis, vt
cadit sub reuelatione virtuali: ita quod ipsa Dei-
tas sit ratio formalis *qua*: reuelatio verò diuina,
virtualis, & mediatæ, ratio formalis *sub qua*.
Objectum autem materiale, extensum, & ter-
minatum, quodcumque reuelatum à Deo. In
hac sententiæ sic explicata, iam ferè omnes con-
ueniunt: quamus olim quidam antiqui Theolo-
gi assignauerint alia diversa objecta, vt res & fi-
gna, Christum vt Redemptorem, vel opus no-
stræ reparationis, Deum vt præmiatorem, vel vt
ultimum finem, actum meritorum, & similia:
Attendentes (inquit S. Doctor hic art. 7.) ad
*ea que tractantur in ipsa scientia, non ad ratio-
nem secundum quam considerantur.*

Prima